



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

48. Kalenderwoche – ab 28. November 2010

De Bollezei hads schwähr!

Nee, de Bollezei hads nisch eenfach! Isch meene jedzde ma nisch, dass de Anforderung an de Idelligenz besondorsch hoch is, nee, abor de Anforderung ans Gemiehd, die is werglisch iebormäßig hoch! Also, isch - isch däde das nisch erdraachn! Zum Beischbiel wenn isch Demonschdrandn, die off de Schien rumhoggn, wenn isch die wegdraachn missde! Odor wenn isch misch mid irschendwelsche Raddikahle rumbrieschln missde! Odor mid Fußballfenns! Nee, das däde misch eschd ieborfordorn. Da däde mir dor Geduldsfadn sähr schnell reißen. Solln se doch off de Schien sidznbleim! Isses mei Arsch, dähr da anfriern dud? Un es kann ja werglisch keenor behaubdn, dassor nisch wissn dud, dass Schien keene Sidzmeebl sinn!

Un was hasde als Bollezei von dähr ganzn Miede - alle lachn disch aus un beschimbfn disch - womeeschlich noch als Bulle odor so! Isch däde da gladd ausrasdn! Nee, es is schon guhd, dass isch nisch zur Bollezei gegang bin, obwohl mei Oba immor zu mir gesachd had, dass isch eischendlich das Zeisch dazu ham däde, Bollezeior zu wern. Naja, un die scheene Uniform, die grischd mor ja ooch fiehr umsonsd. So eene Bollzeiuniform is werglisch e scheenes Gosdiehm! Bloß ehm, du mussd ooch das rischdische Närvngosdiehm ham! Wennsde da so embfindlich bisd wie ischs bin... wensde so e Sennsieblschn bisd, da kommsde als Bollezisd nisch weid.

Guhd, du hasd als Bollezei ooch e baar Meeschlichgeidn, wo de disch an de Birschor räschn kannsd. Wo de dir dei Miedschn kiehln kannsd, als leidgebriefdor Bollezisd! Du kannsd zum Beischbiel dursch de Schdadt wandorn un Schdrafzeddl vordeeln. Du kannsd de Audofahrer anhaldn un blasn lassn! Du kannsd, wensde deine Gudste eilisch zum Frisöhr fahrn mussd, mid Blaulischd dursch de Schdadt jachn. Blaulischd dud da viel Zeid einschbarn!

Abor de scheensde Rache sin de Blidzor! Die kannsde ieborall offschdelln un dann rolld dor Rubl!
Dähr Blidzor zum Beischbiel, dähn se am Siedring offgeschdelld ham, dähr dud ofd mähr als
vierhunnordma blidzn bro Daach! In eem Monad had dähr sich ammordesierd!

Ammordesiern? Nee, das had nischd mid Mord zu dun - das dud heeßn, das mähr Geld reingekomm
is, als wie was dähr Schbaß gegosded had. Ja, de Blidzor sin werglisch eene sähr eindräschliche
Infesdidsjohn! Bloß ehm nu widdor... die Blidzor, die nisch ordsgebundn sin, die die jedn Daach wo
annersch offgebaud wern, die wern andauornd von de Radiosendor vorbedzd! Un das is eschd
gemeene! Wenn isch Bollezei sein däde, die dädsch von Bollidessn umzingln lassn! Odor... odor... -
na, isch däde mir schon was einfalln lassn, wenn isch Bollezei sein däde! Hohoho!

Un wenn isch nu eene Blidzorwarnung im Radio heern du, die misch bedreffn kennde... naja, dann
geh isch ooch off de Bremse. Zugegähm! Abor isch hab dann jedsma e schleschdes Gewissn
geeschniebor dor Bollezei. Die ham sich widdor soviel Miehe gegähm - un isch...? Nee, wenn isch
Bollezei sein däde, isch däde misch iebor misch grien un blau ärschorn!

Eduard Sachsenmeyer